

Dolasila tl Mart

Ai 15 de forà el gnü a s'l dè tl Mart da Rorëi n evënt cultural cun l'azënt sön les liëndes ladines, en particular sön la figöra dla prinzëssa Dolasila

Ert - Le publich interessè à podü odèi na istalaziun multimediala. Cun la performance dla musizista y soprann Susy Rottonara, les operes dl scultur y pitur Rott y i tesé dl scritur Roland Verra ti él gnü dè forma ales liëndes ladines. Do la introduziun dl curadù dl proiet Gabriele Lorenzoni, é Roland Verra jü ite sön la sostanza y sön le significat plü sot dles liëndes ladines. Susy Rottonara à spo portè dant n valgönes de sües aries componüdes dal Poëm Musical "Fanes", de chël che al é inçe gnü proietè val' scenes plü significatives adöm a val' perts dl film "Le règn de Fanes".

Le scenar é dominé da na scultöra de lëgn natural de Rott, che rapresentà la prinzëssa Dolasila söl ciaval. Tl sotfunz passà ia les imajes dles pitöres dl artist da La Ila, ispirades ala liënda di Fanes.

L'evënt é jü a piz cun na vijita al'area didatica dl Mart, olache jogh ladins de Fascia dl'Assoziaziun "La Risola" à presentè "Dolomiteslego", ideè da Ermanno Zulian, n plastich dles Dolomites cun bëgn 50.000 tocé de lego. L'ambientaziun tl Mart ti à dè ales liëndes ladines na sugestiun artistica particolare, tl'atmosfera dles liëndes ladines.



I auturs dl'istalaziun Dolasila: le curadù Gabriele Lorenzoni, Rott, Susy Rottonara y Roland Verra.